



28. november 2011

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

1. Naalakkersuisut apeqquqiga nr. 184/2011 akillugu imatut allapput:

“Sorlammut malittarisassat naapertorlugit ersarissumik piunasaqaataavoq, qinnuteqartut ilaasortaasa amerlassusaat ilanngunneqassasoq. Ilangullugu ilisimatitsissutigineqassaaq, aamma tapiissutinik pissarsissagaanni ilaasortat ikinnerpaaffeqartussaammata. Kattuffiit peqatigiiffillu ingerlatsinermut tapiissutinik qinnuteqartillugit aamma ilaasortat amerlassusaat atorneqartarpoq tapiissutip angissusissaanut tunngaviusarpoq”.

Tamatumunnga atatillugu Naalakkersuisut isumaqarpat, ilaasortat kattuffimmut ilaasortaaffigisaminnut akiliisimangitsut, kattuffiup ilaasortanut pisortatigoortumik allattorsimaffiutaanut ilaasinnaasut?

(Inatsisartunut ilaasortaqa Andreas Uldum, Demokraatit)

Tunngavilersuut

Siumup inuusuttaani siulittaasoq Kaalinnguaq Siegstad ulloq 27. oktober tusagassiutinut nalunaarummini oqarpoq, uppersaatissaqartillugu Sara Olsvig Siumumut ilaasortanngorsimasoq 23. juni 2009, tassani aamma ilaasortaanermut akiliisimanerarneqarpoq. Tusagassiutinut nalunaarummi tassani aamma allappoq, Sara Olsvig 2010-mut ilaasortaanerminut akiliisimangitsaq. Naalakkersuisut uannut ilisimatitsissutigaaq (§ 37 naapertorlugu apeqquq nr. 184/2011-mut akissummini) – inuusuttunut kattuffianut ilaasortat amerlassusaat Sorlaap tapisiaanut aalajangiisuusartoq. Tamanna tunngavigalugu isumaqarpunga, pingaaruteqarlunnartoq ilaasortat allattorsimaffiisa nutartersimanissaat eqqortuunissaallu. Uanga isumaga naapertorlugu kukkuneruvoq, ilaasortat allattorsimaffiini nassiunneqartuni allassimappata inuit, ilaasortaanermut akiliisimangitsut. Uanga taamaattut taarusuppakka ilaasortat allattorsimaffii kusassakkat.

Kaalinnguaq Siegstad tusagassiutinut nalunaarummini allappoq, Siumup malittarisassai naapertorlugit kinaluunniit partiimut ilaasortaasartoq, ilaasortap nammineerluni ilaasortaajunnaarniarluni nalunaarnissaata tungaanut. Taamatut ilaasortanik noqitsineq



kusanangitsutut uanga isigaara, isumaqarama, kattuffimmut taamaallaat ilaasortaasoqarsinnaasoq, ilaasortaanermut akiliummik akiliisimangaanni. Soorunami Siumup ilaasortaminut allattorsimaffiutai susassarinngilakka, isumaqarpungali ilaasortat allattorsimaffii soorlu Sorlammut nassiunneqartut, imaqassasut ilaasortanik akiliisimasuinnarnik. Aamma isumanga naapertorlugu taamaassaaq, ilaasortat allattorsimaffiat assersuutigalugu atorneqassappat tapiissutit naatsorsorneqarnissaannut.

Piffissarititaasup ullut sulliviit naliginnaasut qulit iluanni akineqarnissannut qilanaarpunga.